

Na osnovu člana 5. Zakona o privatizaciji preduzeća ("Službene novine Federacije BiH", broj 27/97), Vlada Federacije Bosne i Hercegovine, donosi

**UREDBU
O REVIZIJI PRETHODNO IZVRŠENE VLASNIČKE
TRANSFORMACIJE**

I - OSNOVNE ODREDBE

Član 1.

Ovom uredbom uređuje se postupak i nadležnost u postupku revizije prethodno izvršene vlasničke transformacije preduzeća u čijim je bilansima stanja na dan 31. 12. 1991. godine iskazan dionički kapital ili udjel kapitala, odnosno preduzeća koja su vršila vlasničku transformaciju na osnovu Zakona o društvenom kapitalu ("Službeni list RBiH", broj 2/92) i Zakona o isplati ličnih dohodaka, sredstava za neposrednu zajedničku potrošnju i sredstava za ishranu radnika u toku rada ("Službeni list SFRJ", br.37/90 i 84/90).

Član 2.

Pod revizijom, u smislu ove uredbe, podrazumijeva se utvrđivanje pravilnosti i zakonitosti vlasničke transformacije preduzeća iz člana 1. ove uredbe u pravnom finansijskom i računovodstvenom pogledu.

Revizijom se utvrđuje efektivna vlasnička struktura kapitala preduzeća, odnosno relativno učešće državnog i privatnog kapitala u kapitalu preduzeća na dan 31. 12. 1991. godine, na zakonu osnovane promjene u visini i strukturi kapitala od 1. 1. 1992. godine do 31. 12. 1997. godine, kao i knjigovodstvena vrijednost i relativno učešće državnog i privatnog kapitala u kapitalu preduzeća na dan 31. 12. 1997. godine.

Otplate internih dionica ili udjela iz člana 5. stav 2. Zakona o pretvorbi društvene svojine ("Službeni list RBiH", broj 33/94) smatraju se potraživanjima uplatioca prema preduzeću. Preduzeće će prilikom izrade početnog bilansa odlučiti da li će ta potraživanja vratiti uplatiocima, ili ih upisati kao dionički kapital u skladu sa zakonom.

Član 3.

Pregled u pravnom pogledu iz člana 2. ove uredbe obuhvata provjeru pravilnosti pravnog postupka izvršene vlasničke transformacije preduzeća.

Pregled u finansijskom pogledu člana 2. ove uredbe obuhvata provjeru pravilnosti finansijskih tokova nastalih po osnovu vlasničke transformacije.

Pregled u računovodstvenom pogledu iz člana 2. ove uredbe obuhvata provjeru pravilnosti utvrđivanja i iskazivanja knjigovodstvene vrijednosti društvenog i privatnog kapitala, kao i obračuna i evidentiranja poslovnih promjena nastalih u postupku vlasničke transformacije.

II - POSTUPAK REVIZIJE

Član 4.

Reviziju će vršiti preduzeća registrovana za obavljanje revizije u skladu sa zakonom, kao i Zavod za računovodstvo i reviziju Federacije Bosne i Hercegovine (u daljem tekstu: Revizor), putem ovlaštenih lica.

Preduzeće iz člana 1. ove uredbe obavezno je, Revizoru po vlastitom izboru, podnijeti pismenu prijavu za provođenje revizije u roku od 30 dana od dana stupanja na snagu uputstva iz člana 14. ove uredbe.

Revizor je dužan obaviti reviziju, sačiniti zapisnik i izdati rješenje o rezultatima revizije u roku od 60 dana od dana podnošenja pismene prijave iz stava 2. ovog člana.

U slučaju da Revizor nije u mogućnosti prihvatiti prijavu preduzeća, dužan je u roku od tri dana od dana prijema prijave o tome obavijestiti preduzeće, koje podnosi pismenu prijavu drugom Revizoru u daljnjem roku od sedam dana.

Kopiju prijave iz st. 2. i 4. ovog člana preduzeće istovremeno dostavlja nadležnoj agenciji za privatizaciju (u daljem tekstu: agencija).

U slučaju da preduzeće ne podnese prijavu za reviziju u roku iz st. 2. i 4. , odnosno kopiju prijave iz stava 3. ovog člana, prijavu podnosi agencija u daljnjem roku od 15 dana.

Član 5.

Preduzeće je dužno obezbijediti uslove za rad Revizoru.

Odgovorno lice u preduzeću dužno je predočiti izvještaj, sa dokumentacijom, o izvršenoj vlasničkoj transformaciji.

U slučaju da je dokumentacija uništena ili nedostupna, preduzeće će postupati u skladu sa uputstvom iz člana 14. ove uredbe.

Revizor može izvršiti pregled poslovnih knjiga i dokumentacije drugog pravnog lica koje je statusnim promjenama, prijenosom kapitala ili stalnih sredstava ili na drugi način povezana sa preduzećem u kojem se provodi postupak revizije.

Član 6.

U postupku revizije sa pravnog aspekta Revizor obavlja slijedeće radnje:

- 1) utvrđuje pravni osnov izvršene vlasničke transformacije i provjerava njegovu zakonitost;
- 2) pregleda odluke i rješenja o upisu promjena u sudski registar;
- 3) provjerava da li je izvršen upis u sudski registar promjena po osnovu vlasničke transformacije;
- 4) utvrđuje vrste izdatih vrijednosnih papira;
- 5) provjerava da li su radnje provedene u postupku vlasničke transformacije obavljene na način utvrđen odlukama organa preduzeća;
- 6) druge radnje koje se u postupku revizije ocijene kao neophodne.

U postupku revizije sa računovodstvenog aspekta Revizor provjerava:

- 1) da li su knjizenja izvršena u skladu sa propisima i na osnovu vjerodostojnih knjigovodstvenih isprava na društveni i dionički, odnosno privatni kapital;
- 2) da li je u poslovnim knjigama evidentiran cjelokupan postupak transformacije na način utvrđen opštim aktom i

- 3) da li je izvršena revalorizacija i raspored revalorizacionih rezervi, dobiti, gubitka, ratnih šteta i drugih obračunskih pozicija na društveni (državni) i dionički (privatni) kapital;
- 4) druge radnje koje se u postupku revizije ocijene kao neophodne.

U postupku revizije sa finansijskog aspekta Revozir provjerava:

- 1) u slučaju prodaje ili dokapitalizacije na kredit, utvrđuje i analizira uslove prodaje, iznose i uslove kredita;
- 2) u slučaju otkupa i dokapitalizacije sredstvima učešća u ostvarenoj dobiti, utvrđuje način i odnose raspodjele dobiti u zavisnosti od strukture kapitala, odnosno da li je u korist društvenog kapitala raspoređen dio dobiti srazmjerno njegovom učešću u ukupnom nominiranom kapitalu preduzeća;
- 3) u slučaju otkupa i dokapitalizacije sredstvima paušalno isplaćenih putnih troškova, dnevnica i drugih paušalnih isplata, utvrđuje iznos paušalnih isplata koje su radnici upotrijebili za otkup dionica, odnosno udjela;
- 4) u slučaju izdavanja dionica i obveznica na osnovu neisplaćenih plaća i po drugim osnovama, utvrđuje da li je preduzeće izdavalo dionice i obveznice u bruto ili neto iznosu, da li je vršilo obračun i plaćalo propisane poreze i doprinose, da li je izdavanje dionica prouzrokovalo nastajanje ili povećanje gubitka, kao i da li je emisija dionica i obveznica bila u okvirima kolektivnog ugovora o plaćama;
- 5) u slučaju izdavanja prioriternih dionica za društveni kapital, utvrđuje se da li je preduzeće prenijelo, u skladu sa zakonom, društveni kapital na dionički kapital, odnosno udjele, kao i da li je raspodjela dobiti i drugih obračunskih pozicija vršena srazmjerno strukturi kapitala;
- 6) u slučaju prijenosa društvenog kapitala bez naknade, utvrđuje se da li je prijenos omogućio davanje zajma na osnovu koga je došlo do umanjenja društvenog kapitala;
- 7) u slučaju prodaje preduzeća ili dijela preduzeća, utvrđuje da li je prodaja obavljena u skladu sa zakonom i da li je plaćanje izvršeno na način utvrđen ugovorom i zakonom;
- 8) u slučaju podjele imovine na dva ili više preduzeća, sticanja i prijenosa kapitala u drugom preduzeću ili investiranja kapitala u novo preduzeće, utvrđuje pravilnost radnji izvršenih u toku navedenih postupaka i
- 9) druge radnje koje se u postupku revizije ocijene kao neophodne.

Član 7.

Kod preduzeća koje je iskazalo gubitak za 1990. i 1991. godinu, storniraju se iznosi dioničkog kapitala formiranog na teret gubitka po osnovu Zakona o isplati ličnih dohodaka, sredstava za neposrednu zajedničku potrošnju i sredstava za ishranu radnika u toku rada.

Član 8.

Zapisnik o izvršenoj reviziji obavezno sadrži:

- 1) nalaze revizije sa pravnog, finansijskog i računovodstvenog aspekta;
- 2) ocjenu pravilnosti postupka vlasničke transformacije;
- 3) ispravke knjiženja po osnovu uočenih nepravilnosti u postupku privatizacije, zaključno sa danom okončanja revizije i
- 4) vlasničku strukturu, odnosno iznose i relativno učešće državnog i dioničkog, odnosno privatnog kapitala na dan 31. 12. 1991. i 31. 12. 1997. godine.

Rješenjem o rezultatima revizije potvrđuje se pravilnost postupka vlasničke transformacije ili se utvrđuju ispravke u bilanci stanja preduzeća po osnovu nepravilnosti u postupku vlasničke transformacije. Rješenje o rezultatima revizije obavezno sadrži elemente iz tač. 2. do 4. stav 1. ovog člana.

Sadržaj i oblik zapisnika o izvršenoj reviziji i rješenja o rezultatima revizije je sastavni dio uputstva iz člana 14. ove uredbe.

Član 9.

Zapisnik o izvršenoj reviziji i rješenje o rezultatima revizije, u roku od 15 dana od dana okončanja revizije, Revizor dostavlja preduzeću i agenciji.

Na rješenje iz stava 1. ovog člana preduzeće, agencija i dioničari mogu, u pisanoj formi, podnijeti žalbu Federalnom ministarstvu financija-Federalnom ministarstvu finansija (u daljem tekstu: Ministarstvo finansija) u roku od 15 dana od dana prijema rješenja.

Pravo žalbe dioničara ostvaruje se putem preduzeća. Ukoliko organi upravljanja u preduzeću odluče da ne podnose žalbu, dioničari mogu podnijeti žalbu direktno, pod uslovom da se žalba podnosi u ime najmanje 1/4 dioničara.

Ministarstvo finansija je dužno donijeti rješenje po žalbi iz stava 2. ovog člana u roku od 30 dana od dana prijema žalbe.

Član 10.

Troškove revizije snosi preduzeće.

III - KAZNE NE ODREDBE

Član 11.

Novčanom kaznom u iznosu od 10.000 do 50.000 KM kaznit će se za privredni prijestup preduzeće ako ne podnese prijavu (član 4.), ne osigura uslove za rad Revizoru (član 5.) ili ne postupi po uputstvu iz člana 14. ove uredbe.

Za privredni prijestup iz stava 1. ovog člana kaznit će se i odgovorno lice u preduzeću novčanom kaznom u iznosu od 1.000 do 5.000 KM.

Novčanom kaznom u iznosu od 1.000 do 5.000 KM kaznit će se za privredni prijestup Revizor ako ne postupi po uputstvu iz člana 14. ili ne dostavi rješenje i zapisnik u skladu sa članom 9. stav 1. ove uredbe.

Za privredni prijestup iz stava 3. ovog člana kaznit će se i odgovorno lice Revizor novčanom kaznom u iznosu od 1.000 do 5.000 KM.

Član 12.

Do puštanja u opticaj KM, novčane kazne iz člana 11. ovog zakona mogu se plaćati u DEM ili protuvrijednosti valuta koje se koriste u platnom prometu Federacije Bosne i Hercegovine, po srednjem kursu na dan plaćanja koji utvrđuje i objavljuje nadležna finansijska institucija.

IV - PRELAZNE I ZAVRŠNE ODREDBE

Član 13.

Rezultati revizije utvrđeni rješenjem izdatim u skladu sa Uredbom o reviziji vlasničkih transformacija izvršenih po Zakonu o društvenom kapitalu ("Službeni list RBiH", broj

41/95) su osnova za utvrđivanje vlasničke strukture po stanju na dan 31. 12. 1997. godine u skladu sa ovom uredbom.

U preduzećima u kojima je revizija započeta u skladu sa uredbom iz stava 1. ovog člana, a nije završena, revizija će se nastaviti u skladu sa ovom uredbom.

Preduzeća koja su podnijela pismenu prijavu za provođenje revizije u skladu sa uredbom iz stava 1. ovog člana, a ista nije započeta, postupiće po odredbama člana 4. ove uredbe. Za iznos uplaćenog avansa može se podnijeti zahtjev za povrat.

Član 14.

Federalni ministar financija-Federalni ministar finansija (u daljem tekstu: Ministar finansija) će, u saradnji sa Zavodom za računovodstvo i reviziju Federacije Bosne i Hercegovine, donijeti uputstvo o načinu prijavljivanja, potrebnim podacima i dokumentaciji i o postupku revizije u skladu sa ovom uredbom, u roku od 15 dana od dana stupanja na snagu ove uredbe.

Ministar finansija će propisati sadržaj i oblik zapisnika o izvršenoj reviziji i rješenja o rezultatima revizije u roku od 15 dana od dana stupanja na snagu ove uredbe.

Član 15.

Danom stupanja na snagu ove uredbe, na teritoriji Federacije Bosne i Hercegovine prestaje primjena Uredbe o reviziji vlasničkih transformacija izvršenih po Zakonu o društvenom kapitalu ("Službeni list RBiH", broj 41/95).

Član 16.

Ova uredba stupa na snagu danom objavljivanja u "Službenim novinama Federacije BiH".